

墓誌銘

清陰集
十二

清陰先生集卷之三十四

墓誌銘九首

崔君可通墓誌銘并序

湖之西報恩縣有處士崔君與成大谷同時大谷
不妄交在一鄉與處士交最善仍交之於曹南冥
成東洲趙龍門諸賢皆與為友至今聞四先生之
風者亦能知處士之為人也處士諱興霖有子曰
明遠字可通生四歲喪母稍長哀慕不已遇忌日
外寢不食食不與人言笑終其日如在廬室之
中祭具必躬泣而手執之以致其誠焉事處士君

備志物之養晨詣寢所起居無故不輒去左右至
昏定然後乃退日以為恒積二十年未嘗或怠及
處士君歿毀瘠幾不全猶竭力盡禮裹經以居哭
塚不避雨雪眼闕自以支子不敢祭藏遺衣冠于
其家朝夕參出入告如平生事兄如事父視兄之
子如已子吉凶所不給以其家助之一得美味必
分而共之鄉黨咸稱之無二口君本無求於世世
亦無知君者故終於埋沒不聞君生于某年某月
卒於某年某月壽四十葬于縣西國祀峰先塋側
卯向之原按崔氏望和順始出全州其後不知所

以徙十二世至阿為高麗右相謚文成又九傳至
永濡恭愍朝守海州死賊不屈海州之後連五代
擢文科貴顯曾祖諱重清廣興倉守祖諱堦不仕
君娶新平李光啓女生一男一女男大允義州判
官著廉聲女適士人洪士哲側室二男一女曰大
寬大峻女適申泊判官一男壽海判官以家狀屬
余曰先人生既不遇於時死又不傳於後不肖之
所深痛也請子之圖不朽者余屢求不獲曰嗟乎
惜哉一家父子兩世賢孝有如是而壅於上聞以
虧朝家彰善之美誰任其責者雖余之辭不足以

清隱先生集卷之二十四
賁諸幽顧安忍使之泯泯不章以負其孤之望而
重受責於君子也是為之銘銘曰

伊士何觀觀乎行成行維何先孝親順兄苟行不
備雖顯孰榮行尊身卑君子之貞猗歟崔門世隆
隱德舉世莫知惟賢者識教豈無素厥祖忠臣勿
云報輕將啓後人峩峩新阡山秀水清嘉耦同
塋死穀偕減惇惇嗣子正銘誌墓銘之者誰惟金
叔度

尚瑞直長任君墓誌銘并序

贈左承旨豐川任公諱鐸字士振原州牧使夢臣

之子也性勁直操履甚確聞有好學篤行者必往
交之遊栗谷牛溪之門讀程朱性理書心悅而好
之以親老屈意功令不能專精講學年三十三中
司馬居賢關為士友所推重癸未栗谷被三司論
劾羣小肆為誣捏牛溪上疏力辨並被詆斥公時
掌議太學倡諸生抗章伸救由是異論者多忌之
按狀七世祖山寶高麗檢校漢城尹生判撫山中
善撫山娶柳巷韓脩女生報恩縣監孝敦報恩生
遂安郡守漢遂安生司憲府監察由遜 贈承政
院左承旨承旨生內膳寺正楨 贈禮曹叅判叅

判生原州 贈議政府左贊成配宋氏貞敬夫人
資成治家涖官俱有法度宋夫人孝行聞鄉里嘉
靖甲辰十一月庚戌生公少育於大父叅判家叅
判愛其馴行必稱孝意居父憂廬塚旁食粥不食
食哀毀踰制後服大母喪亦無不盡母夫人年老
喪眼因病篤久在牀第公日夜涕泣求醫訪藥親
自嘗糞疾竟良已銓曹薦授童蒙教官二歲遇有
不悅者掌春官假考績修劬以困之遂退不仕久
之拜瓦署別提士辰倭鋒薄都 宣廟西幸公以
召募官往京圻江原黃海二道募聚兵糧復 命

行在陞尚瑞院直長 皇朝經略宋應昌之來賓
使尹公根壽薦為製述官癸巳 扈從還都又為
都監郎接待 天將積傷勞瘁明年三月以疾卒
享年五十一家大窘親朋扶服乃克葬公平生敦
素絕無世俗紛華之習簡伉自重就靜室儼然危
坐人不敢以非理干性好施其人親也必濟其急
賢也雖踈其赴急如親者焉嘗會試對策名在選
中主司一人持觥辭用他製而黜公卷聞者謂宜
升而屈公獨不形色辭公前以勞 命陞叙秉銓
者故遲之竟限七品至歿後用公扈 聖從勲始

舉贈典識公者咸悼惜焉自遂安至公五世葬
楊州陶穴里笥谷村後三十三年天啓丙寅改葬
公墓午向之原去舊壙十許步夫人申氏祔夫人
高靈大姓忠義衛孟瀛之女牧使永澈之曾孫生
三男二女獻之進士次勉之蚤歿賚之文科典籍
以善喪稱女長適進士權佶次府使韓訥獻之一
男二女大咒女適鄭詡尹竣勉之死后賚之三男
三女大材大維大治女適李雲植餘未行曾孫男
女若干人銘曰

嗟惟君懿厥資若有以予之奚卒以尼之官居人

後行出入先而垂於時乃全其天惟孝為政何必
公卿有來千岭有徵斯銘

吏曹判書 贈謚文簡芝峰李公墓誌銘并

公諱晬光字潤卿自號芝峰系出濬源兵曹判
書 贈領議政諱希儉之子河東君裕之孫仙槎
君承孫之曾孫仙槎之父曰牟陽君植牟陽之父
曰敬寧君謚齊簡公祔即我 恭定大王之子也
母貞敬夫人文化柳氏議政受知 明 宣兩朝
忠蓋篤厚號為名臣夫人明懿配德外內俱宜嘉
靖癸亥二月生公在妊有異夢既生朗異絕倫五

歲知讀書聰敏強記若素習者然嘗命賦雪詩語
意精一見者驚異年十三四已如成人出游國庠
上友以傾戊寅中解舉明年遭議政公喪毀削成
疾服闋惟不克嗣家聲是懼益勵為學藝業日進
時李文成公珥柄文春許可見公詩文稱為冠首
壬午成進士乙酉擢大科選補承文院權知副正
字薦入史館為檢閱待教奉教適時多事館寮累
缺公獨能辦職轉成均館典籍遷司憲府監察歷
司諫院正言戶兵二曹佐郎帶知制衣教克書扶官
如京賀節還為黃海都事公於論議不輕示左右

靜嘿自守不知者妄忖斥出士論惜之明年親病
解歸為禮曹佐郎弘文館修撰司憲府持平吏曹
佐郎因事坐罷未幾復叙壬辰夏倭警甚急慶尚
道防禦使趙倬慕公請為從事已而愍公母老無
兄弟私謂可以從軍法自免公以為國家有難
敢顧私乎隨至嶺南常在矢石之地亦不怖久乃
聞大駕西幸又防禦使合湖南兵戰龍仁軍潰
朝廷先以公為修撰遂西奔行在間閑得達陞
拜副校理九月陳疏乞往北道尋母上命差宣
諭御史仍察本路事情至明川拜大夫人時咸關

以止被奸民誑誤昧於達順兩王子及宰臣皆
陷虜不復知有朝廷號令公蜚檄諭以大義聞
者感厲人心遂定還拜持平荐改校理獻納兵曹
正郎陞侍講院弼善司憲府掌令無史職又陞執
義上劄劾陳中興要務上嘉納扈從還都庶事
搶攘辭令日繁倉卒副急多籍公手起拜承政院
同副承旨序陞左承旨改兵曹叅知丁內艱丁酉
外除復拜承旨適授大司成以分度支餽天將
揚元軍于南原朝辭上憇其病命改之皇
極殿灾如京進慰已亥冬拜吏曹叅議時朝論益

携旣逐西厓柳相並及完平李公二公皆一時重
望公見時事大亂請急以避之時輩大恚亟欲中
傷之然終不能害公庚子為大司諫同寮有樂禍
者百計敲撼公不為動辭適拜弘文館副提學校
進周易古經 賜厯馬朱梁詔使之來差都司迎
慰使中道病歸兩拜銓曹皆辭適拜副提學易經
諺解成 賜厯馬 宣祖冊立繼妃公上劄請用
古禮廟見報聞羣臣請上尊號 宣廟久不許大
臣中權倖者主其議百寮和附公獨示異先是公
在銓席用士流不附勢者數人擬諸清選而倖相

有姪子素無賴驟欲通顯路為公所持銜未發至
是機鋒大露公遂丐外得安邊府使其年春旱甚
公操文躬禱即日大雨府地舊無蓮楊蓬萊士彥
為守鑿池始種堙廢數十年公至忽復生父老咸
異之政成 賜帛褒美公勞勩致疾明年自免去
宿憾脩郤復出為洪州牧使湖俗悍訟公清靜為
理聚邑諸生于校中勸課有法四旁學子聞風競
集居三年方伯以治蹟聞而公已病歸庚戌 宣
祖祔廟以都承旨陪祀禮成陞嘉善大夫拜禮曹
叅判兼承文院提調改大司諫又改大司憲辭遫

差奏請使如京師得准明年還進嘉義大夫
公三聘上國橐裝如洗絲毫無所浼與安南琉
球暹羅諸國使相遇丐公詩文一皆藏去後我國
人為海寇掠賣至安南回者言彼中重公文章人
誦家詠稱李芝峰而不名於是乃知公之華問達
於四海之外矣術人李懿信上言漢京王氣已衰
宜徙都交河光海遽命宰臣集議人情遑惑公率
玉堂諸寮極陳荒誕無稽不當庭議反覆累數百
言後事竟寢光海追尊所生母遣使請命于中
朝公又劄論禮無二嫡仲子聲風之事見非春秋

爭之甚力時言事者累遭譴斥朝家遇有大議論
臺閣觀望莫敢先發公必倡言不顧士林倚以為
重癸丑再授大司憲皆不拜李甫瞻喉死囚起大
獄導光海殺永昌大君及國舅金悌男盡逐先
朝大臣錮 母后于西宮將謀貶號公杜門屏居
者四年丙辰斥守順天府使正身率物民悅而從
令自學校田井細至米鹽薪芻措畫有方著為定
式公私賴之秩滿去官民刻石紀德既歸退居鄉
曲冬夏一室雖家人罕得見面奸黨內忌凡有名
行者必欲汙染指摘物色人莫能脫累除公京官

使職俱不就光海舉名公及鄭公暉等數人責以
不仕令有司即訊人皆危之會赦得免公上疏自
陳病憊不任職光海督責益嚴不獲已暫至京即
歸癸亥 今上反正以都承旨召還兼弘文館提
學改大司諫吏曹叅判甲子春李适叛扈駕南
幸還加資憲大夫拜議政府右叅贊十月進冊于
王大妃用撰冊加正憲大夫左叅贊兼同知經
筵屢改知敦寧工曹判書大司憲適灾異求言公
上萬言劄略曰天下之事務至廣而所以操之者
誠也誠即實也願 殿下盡誠於上責實於下以

實心而行實政以實功而致實効使念念皆實事
事皆實因歷舉十二条一曰勤學之實二曰正心
之實三曰敬天之實四曰恤民之實五曰納諫之
實六曰振紀綱之實七曰任大臣之實九曰消朋
黨之實十曰飭戎備之實十一曰厚風俗之實十
二曰明法制之實 上手札優獎時上下崇尚虛
文事無誠實公指陳病源言甚切至而亦不能用
丁卯春西虜深入 上移蹕江都 命世子分駐
湖南朝臣老病者任便所往或勸公江都迫隘公
之二子皆在南不如姑往分朝公毅然曰君為仁

臣為忠可也遂赴行在寇退拜大司憲大亂之後人多負犯惧罪者夥公務持平恕人情乃安戊辰七月拜吏曹判書公力辭章八上不允乃出奔競屏迹門庭如水一日公病未赴政同寮注擬公醫局提調批下公引嫌乞免談者謂即此一事亦衰世罕見冬暴風疾不能言上遣醫診視仍賜御藥公長子聖求任全羅監司發騎諭令母代疾還皆異數也適授西樞至十二月二十六日終於正寢春秋六十有六訃聞上震悼輟朝吊賻賜祭並有加用二子從勲贈大匡輔國

崇祿大夫議政府領議政兼領 經筵弘文館藝
文館春秋館觀象監事 世子師太常謚曰文簡
按謚法勤學好問曰文一德不懈曰簡明年二月
丁酉葬揚州西山長興里先議政兆次貞敬夫人
金氏祔夫人先公十三歲歿公嘗誌其藏公為人
端重詳雅蚤孤不事游學考績經旨修敬自持不
苟言笑不大聲色身若不勝衣而見之者無敢媒
狎弱冠通籍徧歷華貫其操身恒若處子以呂大
防范祖禹自期世方分黨排擊為事而獨不為已
甚之論一時翕然推許自議政公素著廉聲至公

愈自謹飭俸祿之外不長尺寸妻子內困不恤也
一切世味紛華泊然無所好好觀書汎濫百家以
至異端老佛之說領略歸趣晚悉屏去只留性理
諸書語人曰簡以制煩靜以制動八字終身服膺
而未得焉著學戒喻其志意而以進德修業須在
早年勤勤勉人戊辰元日作自新箴有曰人苟得
新雖老猶新改過則新遷善則新舍舊就新是謂
一新聖賢道新亘古長新君子以是知公平日克
治之功立朝四十餘年凡遇除拜非三四蘄免不
出出亦不肯久輒以時月免盖其雅性恬退不樂

榮進如此與寡姊同居教訓孤甥而婚娶之待諸
窮族恩意備至下逮僕隸之賤莫不以其道爲所
居凝塵滿室儼然若忘情於世事者而一心憂國
常言經亂之民如經大病惟當靜以鎮撫而時好
紛更此其弊也對 上論國家利病甚多退而不
泄人欺知者公卒後 上對羣臣語及公銓序有
秩追思不已平生不薰香不然燭不設宴會不聽
聲樂衣服無采色錦綺器用無丹雘雕鏤寒素之
節與布衣時無變嘗据經自製深衣及歿親賓用
以爲殮曰不可以文綺溷我公文章馴雅詩甚清

麗簡易崔豈以為斯文之託在是所著芝峰集二
十三卷類說二十卷采薪雜錄二卷讀書錄解一
卷東燭雜記二卷警語雜編一卷剩說餘編二卷
昇平志二卷又有纂錄羣書五部並藏于家公有
二男一女聖求吏曹叅判敏求大司成女適承文
院副正字權倣叅判娶舍人權昕女生四男二女
尚揆同揆女說書李一相餘幼大司成娶牧使尹
暉女生二男一女元揆重揆女申昇正字三男四
女躋蹟趾女尹元舉金挺坤韓後琦李明徵曾孫
男女若干人文貞申公欽與公莫逆嘗有記曰芝

清江先生集卷之二十四
峰雅操出塵歷盡世變未嘗少挫見幾而作免於
機阱真金玉君子也嗚呼此誠知公也哉叅判昆
弟謂尚憲素習於公而不喜諛也畀狀屬銘義不
可辭謹就其狀略加叙次而系以銘銘曰

溫如良玉而脩栗然之義順若婦女而秉強哉之
志進脩篤實兮文章餘事謙虛退讓兮譽望不已
繼前徽兮開後嗣昭昭光兮耿耿社明摸慙範可
傳百祀國有史兮竊有志凡百君子曷不敬視世
思公兮公在此

貞夫人開城高氏墓誌銘并序

同知中樞府事李公惟侃之夫人開城高氏禦侮
將軍忠佐衛大護軍諱漢良之女其先有為高麗
平章事者曰地基能文章有大名入我朝有諱守
謙信川郡守錄靖國勲卒 贈工曹判書開城君
有諱慶琮桃源道察訪於夫人為大父也夫人蚤
孤與母金氏鞠於曾大母家天性孝慈和厚年十
六字曾大母及母歿喪祭無不自盡外王母孀居
貧窮奉迎于家事之如母王母寢疾家人勸避不
從晝夜不去側親自救藥遂至良已同知公家產
素狹夫人能劬躬謹度施守調適雖內困乏不使

公知奉先敬而盡禮教子愛而不佚待賓客親戚
一順夫子之意翼孤弟業其家公有孽女濱死禱
之占用人代所代方執事夫人者夫人聞即許之
無難色人以為難生三男三女景稷厯戶兵曹叅
判開城府留守京圻觀察使致養郅隆景奭由侍
從給諫久居銀臺擢長諫垣荐蒙 珎錫俾遺老
親人以為榮中子景嵩卒官金溝縣令長女壻朴
知誠司憲府執義次尹瀍新昌縣監次崔徽之自
如道察訪觀察男三女三長英繕工監役起英正
英女與金溝四女皆士人妻大諫男一哲英女一

幼内外曾孫若干人夫人視公爵再膺封 命公
年八十一夫婦俱在二子並腰金珥貂 恩慶輝
赫諸孫環侍膝下脩享舍飴之樂人以為福年七
十四崇禎壬申六月九日卒殯于果川縣杜堂里
冠岳山之南明年二月某甲窆于其里某向之原
去舅姑墓五里而近尚憲與同知公同為分司官
又與觀察昆弟同省習聞夫人賢德將葬請銘甚
勤誼不可辭遂叙而銘之銘曰

夫及婦兮偕榮而偕壽子顯以揚名兮難弟難兄
人孰不願兮而全者罕嗟惟夫人曷由斯臻匪天

伊私維德之提

同知中樞府事李公墓誌銘并序

宣祖丁未歲余分司松都得益僚曰李公剛仲公
蓋長余二十年而余先與公胤子今叅判景稷游
余仲氏又嘗與公為僚甚驩遂為父子兄弟交時
留後恃奧援處公事常出法度外公及余俱有不
遇之歎而益相勉勵期不失所以待已待民者終
不棄焉甲戌余田居聞公訃走書以吊葬已叅判
兄弟致狀請誌墓辭不獲謹按公諱惟侃剛仲其
字考曰 贈吏曹叅判秀光我 恭靖大王五世

孫也德泉君某新宗君孝伯莞城君貴丁咸豐都
正繼壽寔為四親妣貞夫人安東金氏忠義衛彥
禎女高麗上洛君方慶之後生公於嘉靖庚戌蚤
孤就依母黨幸村先生閔純學十九母歿廬墓服
闋累舉不遂四十始名司馬公之知己白沙李相
恒福判西銓舉以授職由四山監役轉通禮院引
儀兼漢城府叅軍出為堤川縣監厯刑曹佐郎平
壤府判官山陰縣監掌隸院司評開城府都事軍
器寺僉正天安郡守社稷署令敦寧府僉正中樞
府經歷廣興倉守司贍寺副正司導寺正僉知中

樞府事敦寧府都正同知中樞府事年八十五病卒于家公天性慈良而遇事剴果於所當為而人所難者決意不顧其為官不矯情不求名精思力行所至郡邑先立約條犯者必罪事簡而易治嘗為賑卹卽廳所活甚多人謂必有陰報壬辰兵後堤川為孔道天朝將士輻輳徵督嚴急山氓不習賓客皆鳥獸散幾不為邑公至殫誠保聚大小接應先盡已而不責人過者無不悅喜由是堤民遂安亡何賊入近境主畫者失機駕罪一二守宰以自脫公身屈名伸堤人久而不忘紀其績于碑

山陰俗素鯁且有挾肉視官吏公以計柔制雖不敢顯傷公然竟坐罷在天安首罷無名之糴為吏隸害者衆憂其無繼公節縮他冗卒以告裕始到官無餘儲迨季年粟溢廩不能受貲之別庫或勸公申報不聽蓋時人多以此覬倖賞故也於是公年六十四公謂國制有年格何必法加然後乃去徑自決歸家素貧無營妻子內困不以為意仲兄年老子前死無所養公奉歸旁舍朝夕視供不令其為衣食憂都正公孽女嫠老窮居亦贍養于家歿又殮葬無憾公之同里李公好閔徐公消姜公

網相與忘形為莫逆交作真率會公年最高身最
強爵又最大諸公皆推公居前調譔諧笑脩極歡
適樂而無倦公之二子大科列卿夫人善家內外
雍睦世以至行厚福歸公已巳壽爵陞秩庚午又
陞一階季子景奭為承旨內出黃柑下教曰
聞有老親故特賜公上箋陳謝又教曰卿年高
二子皆可用子用念之薦紳傳說詠歌以為曠世
異數公自傷養不逮親平生不御鮮衣異味忌日
哀慕如喪祭極誠敬又著祭式以率親族之不如
禮者貧不能祭者輒替行之二兄年皆八十友愛

逾篤仲兄嘗溫病殆舉家相染人不敢過其門公
日夜扶救不去俱得全活後友人家亦病癘為之
醫治往來終不染人異之幸村歿子姓貧弱及夫
人喪費多出諸門人而公實倡之時節祭祀每推
贏餘助給遇其忌日必喪食白沙公久秉銓衡里
中人無不造請公獨不言以此益親重與人交一
定不易直友之冤不避汙跡寇亂急一馬與所識
納官身自徒步其疎財重義又如此聞人善行至
於感涕而其有負犯不義者拒之甚嚴居家訓子
女有法常誡二子曰吾父子蒙 國家厚恩無以

報德若等勉之臨歿神氣不乱屏去女使所御罷
用一整齊有序理鬚正卧脩然而逝遺命用縛袴
曰服此見先人于地下訃聞上命有司吊賻如
禮以是年十月甲午合葬于果川縣冠岳山下丙
坐之原高夫人墓右夫人別有誌公有三男三女
長景稷兵曹叅判次景嵩金溝縣令先夭次景奭
副提學女適承旨朴知識次縣監尹瀍次察訪崔
徽之叅判三男三女長英起英正英女李時中姜
弘益尹世昌縣令四女沈樞權克敷申澄尹浦副
學一男一女哲英女幼朴知識四男三女尹瀍一

男崔徽之四男三女内外曾玄揔若干人銘曰
先王隱德畜而為澤永世不斬公惟別支監于成
規孝友自範神之降福謙以受益盈而不濫猗嗟
後嗣曷不是似源流湛湛載銘幽石厥行孔哲玄
宮匪黷有來千秋有畢斯丘有誰敢犯

同知中樞府事權公墓誌銘

并序

公諱恂字彥忱自號雙泉安東人本姓金氏新羅
王族遠祖幸當羅季討甄萱迎麗祖麗祖以其炳
幾達權賜姓權氏籍于安東安東之有權氏自此
始奕世載德繼踵公卿國初有諱近號陽村先

生生躋仍父子致位三孤生摩縣監生僑郡守生
勳府使三世官不達至公皇考諱轍歷事四朝
位議政府領議政追贈縣監吏曹判書郡守左
贊成父府使如其官為人嚴重持大體數近代名
相必在其間配曰貞敬夫人曹氏昌寧貴族以嘉
靖丙申三月十三日生公幼有異度及長從諸生
受經循循謹飭不以公卿子有所挾既屢舉不遂
年四十二仕為四山監役官戊寅議政公卒服闋
除歸厚署別提壬午丁母憂前後以善喪聞喪除
除造紙署別提選為義禁府都事坐事罷已還造

紙轉軍資監主簿壬辰之難徒步扈從不得達
亡何公之弟都元帥慄時為全羅巡察使提師入
援駐禿城公即赴之已移軍幸州賊悉銳攻圍自
朝至暮士力乏矢竭賊扶柵爭入公親督一隊手
石迎擊勢如飛礮中賊矢不動益力賊不敢進遂
退捷聞宣祖識之曰權慄有兄亦如是也特陞
通政已拜揚州牧使數月棄官歸坐逮即出拜五
衛將甲午王妃如海州差分承旨扈衛明年拜
青松府使以在外見適復拜衛將又拜平山府使
鳳山郡守言路泥之皆不赴丁酉再難以沈時擊

接伴使往來西路者三又隨彭中軍李總兵再往
嶺南島山之役同在軍中總兵戰死送喪至義州
還拜僉知中樞府事已拜丹陽郡守驪州坡州牧
使病不赴赴長湍府使坐事罷亡何 朝廷錄俸

臣勞公用久勩陞秩嘉善叙復散職庚子拜同知
中樞府事兼五衛都總府副總管請告歸鄉至乙
巳秋省掃揚州遇疾昇還家明年三月二日卒于
江華之某里春秋七十有一公用幸州功密宣武
從勲 贈議政府左叅贊兼知義禁府事是年五
月十七日從葬洪福山鴨谷巽向之原先議政公

墓側公容貌嶸嶸有立其中寬然長者議政公家
法甚嚴閨門肅若朝廷公周旋承奉未嘗有過議
政公愛之嘗曰汝縱不能以科第進當不後士類
中人性喜施人有所求輒舉以與之家無長物居
官廩惠並著及歸行李如往時家人未免稱貸夷
然不以為意雅好山水小築在邱山徜徉其間恍
而忘歸晚居江華扁其堂曰寄傲高舍下畦隨取
而足適情肆體揜慕去羨命酌酣暢優游歲月蓋
戶以外不問也卒以訖終焉夫人坡平尹氏奉常
副正先哲之女開城留守倬之孫甚有婦德宗族

咸稱之年六十壬辰十二月十八日病歿於江筆
葬于其地至甲寅移就公墓而合窆有三男一女
曰晉慶武科壯元黃海節度使曰履慶金城縣令
曰益慶司憲府監察女適府使李壽俊側室二男
三女外慶亦武科壯元白翎鎮僉使次復慶女為
同知朴振英司議李德言妻李蚤寡內外曾玄孫
四十餘人尚憲丘嫂於公為兄子我伯氏亟稱其
好氣槩殿中君紹介丐銘許而未有復也伯氏既
遘難舍生而殿中君同時不幸今當屬辭之際為
之重感以悲也嗚呼銘曰

有崇其封有幽其宿有來千年不震不撼

贈領議政行 世子侍講院輔德羅公墓誌

銘并序

蓋當我 昭敬王之世有 世子輔德羅公其為
人孝子於家廉吏於官長者於鄉一時談者無二
口余父兄俱善公而公又遜行視余友因以知公
之久而益信談口之為篤論也公歿之三十二年
胤子叅議君抱狀來請曰先君之壙也不肖孤未
有知及有知而先友之在世者幾盡及今而補前
闕者唯吾子在幸以先人之故惠以一言庶不恨

其不蚤也遂不敢辭叙而銘之謹按公諱級字子
升自號後谷羅氏出羅州遠祖天瑞仕高麗有功
封安川君徙籍安定安定後改比安公即比安縣
人曾大父世傑 昌陵叅奉 贈司憲府持平大
父漢太史當權奸擅國直書不隱危得大禍有良
史稱後 贈弘文館校理父諱允忱仍世文科終
成均學諭有德而無年娶別坐李元紀女以嘉靖
壬子二月二十六日生公少即以執文著公車聲
試輒舉首二十五中司馬拜社稷署叅奉三十四
擢文科甲科例授尚衣院直長改軍資監轉通禮

院引儀兼漢城府叅軍選拜兵曹佐郎陞正郎歷
成均館典籍司藝軍器宗簿內資奉常司僕諸寺
正司憲府持平掌令世子侍講院文學弼善輔
德外則茂朱縣監韓山郡守公廣二州牧使平山
府使所居官無不稱治年五十一萬曆壬寅病卒
是年六月二十四日從葬廣州北坊里學諭公死
次酉向之原先以公宣武原從贈都承旨復用
叅議從勲累贈至領議政公內行純脩學諭公
病欲截指進血獲延數日事母夫人若嬰兒慕終
身無違色兄績狂易學諭公以宗祀之重欲先婚

公公執不從兄歿始娶焉姊妹六人貧窶衣食婚姻亡不於公室乎取族黨故舊亦多賴以潤者天性坦夷恬於勢利既第視其志猶未第時既顯視其色猶未顯時既更州郡視其家猶未更州郡時人以此多之始公入朝客有問牛溪栗谷者時論力攻二先生蓋欲嘗試為登斥公矢口荅曰賢人也其人方柄用遂以此沮公困躓十年寂寂無一尉薦而未嘗少見幾微辨人於眸子後果遂滅人服其先見壬辰守韓山主將遇賊先潰公奮手劒欲斬之賊逼不為動聞者壯之亡何擢拜公州牧

使屬兵荒閉糴流殍滿野公至大發倉廩以賑之
遠近聞風至集公夙宵勤劬凡乳哺而衽席之者
無餘力所全活累千百人時飢者爭以珍寶易粟
公戒家人不得市一物斥私俸以濟親故之急世
子久駐本州 中國兵馬繹騷事如蝟興公整暇
不擾酬應有裕 朝廷大才公引置通列及居臺
持法抗勢貴戚側目坐此狃仕塗終不悔陳游擊
雲鴻使留倭營虜情叵測伴臣惧而跣遣公代之
或謂母老鮮兄弟自露可免公毅然曰吾已許身
矣即日就途賊聞公至欲懾之白刃左右接袍者

六十里令由偏門入公神氣不變徐以理折之賊
知不可屈待之如禮卒與游擊俱還公又陰得其
要領條列軍務密奏之其言鑿鑿中窾皆見報可
公素以寬恕得吏民心在平山民有負辜受榜以
它病殞適憐臣之嘆公者長李官顛倒三尺遂其
快心竟集職衆皆稱冤與人交有終始以德報怨
至有感泣鬼神其處事寧緩而無急隘其稱人有
臧而無否其行德人負我而毋負人以故無貴賤
少長親嚮之無間及其歿也哀之惜之若一夫人
金氏光山大姓漢城府參軍好善之女後公三十

六年年八十避兵卒於瑞山郡葬其地生一男一女男曰萬甲即參議君以氣節鳴世女適士人李文衡蚤夭參議娶文肅公鄭暉女生四男二女婚嫁搢紳大家銘曰

坦坦羅公男子哉若人行全百原勇奪三軍德則在竟善不近名誰之不如而不公卿一躡而蹶舍用長沒而生之未究而後之永裕樂哉斯丘於萬春秋

議政府左議政鄭公墓誌銘并序

我舅氏水竹鄭公繼韋平之拜再入政府備享福

祿榮名年八十五病卒于水原雙阜里實崇禎丙
子十二月二十八日也明年閏四月十一日歸葬
果川縣北冠岳山先議政公珪次卯向之原貞敬
夫人韓氏祔焉鄭氏出東萊它郡之鄭亦多顯閥
至稱家法之懿世推東萊氏為冠始祖文道傳子
左僕射穆訖高麗五百年系卿累公奕世輝赫八
本朝有諱賜直提學生東萊君謚翼惠公諱蘭宗
負文武才號為名臣詞華翰墨拚於事功生領議
政謚文翼公諱光弼事 中宗配享廟廷論相業
者 國朝無兩焉生諱福謙江華府使有德而無

年生諱惟吉於公為考歷仕 四朝位左議政文
章德望重一世世稱林塘相公妣曰貞敬夫人原
州元氏觀察使諱繼蔡之女慈惠恭儉有鴈鳩之
仁内外合美鍾德積慶生公於嘉靖壬子十二月
二十六日諱昌衍字景真水竹其自號也生而穎
悟其遊戲異凡兒議政公甚奇愛親自教之學業
日就一時儕流皆傾嚮之屢舉不利年二十八中
司馬連擢大科選補承文院權知副正字薦入史
官為檢閱陞待教奉教轉掌苑署掌苑故事由侍
從遷去者例授清官而議政公方主銓故稍抑以

避顯焉議政公去銓即拜司諫院正言厯戶禮刑
工兵諸曹佐郎宣廟親揀才臣五人賜中秘書
特示獎進備它日顧問而公與焉人以為榮癸未
拜吏曹佐郎時栗谷李文成公典選一意洗滌朋
黨僚佐盡用後進無偏係者登斥之間齒舌滋繁
而公居職四年不受疵玷已賜暇書堂古稱蓬萊
道山儒臣極選公素謙退力辭自免拜弘文館副
應教改司憲府掌令行法不避勢家里端悚息陞
執義又陞同副承旨公資序未及格有教越階注
擬蓋異數也公上疏乞改不許亡何丁議政

公憂過毀幾不全已丑鄭汝立獄起公名出奏書
有金吾逮上謂推官曰予知鄭某為人必不為
惡即釋服闋拜江原道觀察使母病辭適入為兵
曹叅議右副承旨亡何擢拜吏曹叅判移副提學
皆出 肅簡壬辰倭寇傳都公 扈從西幸至東
坡驛 特授禮曹判書公涕泣固辭不許時賊
勢益急請援 中朝文書旁午動關儀部公能以
精誠濟其敏事無慙滯在平壤聞大夫人避兵危
迫陳情解職 上即許命本道給適大夫人幸無
恙母子相見感泣追赴龍灣 行在 上喜悅特

僅一級明年拜大司憲 天兵復平壤與李公德

馨同儔李提督如松十月丁內艱 朝廷棄情敦

勉屢疏終不起公善病羸毀已甚能回田里有終

焉之志 召命數下丁酉夏始還朝一為司寇再

長中臺 中朝資畫主事丁應泰構誣楊經理鎬

移怒我國肆為齟齬 上急欲陳辨權相既受

命而內譁不肯行言路結舌無敢論者公即舉劾

之朝廷肅然 宣祖下教褒予良至己亥拜吏曹

判書自是名入金甌矣已辭遯拜右叅贊又改知

中樞府事數年之中優遊散局澹如也光海初復

拜銓長公以后戚引嫌懇辭不許時新遭大喪人心危懼朝論垂激事機百變公周旋其間常以恬夷劑之喜事者為之少戢士大夫倚以為重明年陞資成又明年為吏曹又明年為兵曹又明年還吏曹皆未久辭適癸丑以後見國事日非居常咄咄杜門屏客罕與人接門外之跡可數也甲寅拜右議政公不拜命請急輒予告自期必退丐免愈力未幾竟適鄭蘊請還璣爵葬以太君禮光海大怒事將不測公上劄力救由是蘊得無死前後橫枉賴公脫禍者頗多衆咸稱之及廢 毋議起百

僚伏閣公不一造庭奸臣欲因而翦異已者逼諸大臣議可不可公又不對奸黨矚光海怒公嗾臺諫請竄之待命于郊外者逾年然竟不能以有加也今上反正起公復拜左議政公引咎蘄免

御批慰諭曰卿之宿德仰慕久矣速出副予飢渴之望公感激出謝嘗入侍筵臣有進啓自士類失協轉輾分裂獨一隊人無携貳者意若誇詡然公言處閑地與處要地異自今觀其後可知上曰卿言是已而朝著間或多矛盾上臨筵謂羣臣鄭相至論予不能忘也公屢病辭獲允拜領

中樞府事深居一室藥餌自衛並乞解樞銜納歲
祿 溫旨不許戊辰廷徒有言欲借公為重以資
誑誘而公實不知者公伏藁 闕下 上遣近臣
諭遣公仍露章請罪復下 御批卿以宿德元老
不染昏朝予常嘉嘆兇徒之舉卿姓名計在病國
卿其安心聞者莫不感服乙亥公病益篤醫問交
道 特賜內劑至明年十二月敵兵猝至 上出
幸倉卒子弟奉公奔雙阜竟至不救嗚呼痛哉
上還都有司以訃聞 命給布易櫬給粟募丁板
蕩之際哀榮之典庶幾有始終矣公天性莊重寡

言笑燕居危坐終日不設情容自少恭儉有寒素
風及居大位過有謙抑逾於庶寮時撫接士大夫
曲盡情禮甥姪來候待如賓客飲食必讓未嘗先
已而後人小心遜行至如此每有恩數輒踧踖
不安曰何以稱塞二子並躋列卿諸壻皆簪纓撫
仕兩孫出入臺省人以比萬石君家而其謹守家
法終始不衰殆過之云臨事果斷確然堅持於其
不可改者雖親愛之言亦不入累秉銓衡益加畏
慎聞人有言先自內訟不與相較以是立朝五十
年無公私之譴孝友純篤至誠無倦八十遇忌日

齋素行祭不廢哀慕如初感動左右伯姊老寡窮
居割俸以贍時節迎置于家奉養一如事親平生
衣無華采案無珍玩家無格築子孫恥為桮觥奴
僕循循法度其導率之方然也夫人清州大姓別
坐世健之女正靜孝順婦道甚修先公三十九年
萬曆戊戌卒得年四十六舉二男五女男曰廣成
兵曹叅判曰廣敬行都承旨女適士人李孝曾次
郡守閔汝纘次觀察使申得淵次佐郎崔魯瞻次
縣監李浩源側室一男杲彩幼叅判娶觀察使黃
謹中女生三男一女男太和觀察使致和吏曹佐

郎萬和生負女適校理尹絳承旨娶都正閔有慶
女生四男三女男至和生負采和知和進士以和
女適縣監李起先次生負洪柱世次韓保李浩源
三男萬堅萬石萬期內外曾玄孫若干人銘曰

侃侃我舅令質圭璋佩服庭訓恭儉是將高位身
謙危朝色莊明夷正志莫我敢黷黃道重新台庭
再陟天語煌煌衮華增榮壽考康寧庶幾百齡
徂運難回奄歸佳城子姓繩繩載永厥聲萬世在
後請考斯銘

外王父左議政林塘鄭府君墓誌銘并序

內弟鄭廣成廣敬兄弟以書遺尚憲曰我王父棄
子孫於今五十二年幽堂之誌不刻無文悞無以
紹先志而貽後裔然前者既不可問後者又不及
知惟兄嘗問而知之矣是以爲屬嗚呼小子何敢
當何敢當既而曰吾聞之愛之斯錄之矣敬之斯
盡其道焉自吾祖而不用吾辭惡乎用吾辭謹爲
之序曰府君諱惟吉字吉元東萊人歷事四朝
致理雍熙德業文章爲世所仰世不以名而以號
曰林塘相公鄭之先遠有代序其可譜者自左僕
射穆顯于高麗遂爲大家厚燾光啓愈遠彌昌曾

王考翼惠公當 我朝文明之際樹績內外位右
叅贊封東萊君是諱蘭宗王考文翼公相 中宗
扶翊士類屢膺奸回致大臣節卒配 廟享是諱
光弼考諱福謙江華都護府使 贈領議政不羸
其年以裕嗣胤大夫人完山李氏宗室長豐令之
孫叅奉諱壽永之女也府君之生在正德乙亥十
一月壬子幼有異質甫齡文翼公教之膝下常語
夫人曰此兒後必至吾位稍長藻思溢發日新富
有才無幾人曹偶中莫或有先之者十七中司馬
第六名諸考官爭欲寘之首金公克成素名知人

謂此子異日國器勿令蚤世亡何金安老盜秉忌
文翼公搆誣遠竄並錮子孫安老敗始解禁而明
年戊戌府君及第中廟遣中使諭文翼公曰予
幸學取士得卿孫為壯元予喜得人其所以錫賚
光寵之者近世未見長老傳以為榮授成均館典
籍改工曹佐郎司諫院正言吏曹佐郎時戚畹交
隙朝著危疑不激不隨士論攸歸遷中樞府都事
以僚右有相避也歷工禮兵三曹正郎仁廟在
東宮妙簡宮僚移侍講院文學竭心輔翊優被
殊渥母病徃省分賜內膳丁寧惻怛之教若家

人焉 賜暇讀書于東湖與李退溪滉金河西麟
厚同薦一時推為冠冕以宣慰使出東萊諭馴倭
使之悍驕者還為吏曹正郎甲辰遭大夫人憂服
闋拜內資寺僉正入中書為檢詳舍人改司憲府
執義弘文館校理應教直提學陞同副承旨故事
東湖讀書至堂上則輟 上特許仍在擬諸文衡
蓋曠代異數也壬子 贈議政公卒服闋拜副提
學 庭試居首 命加一階進都承旨請召李滉
以資 聖學 上嘉納累遷禮曹吏曹叅判大司
憲庚申擢拜禮曹判書亡何為弘文藝文兩館大

提學並兼義禁成均 經筵等事 眷待優異出

則鴻模碩楷羽儀朝端入則從容密勿於咫尺深
嚴之地舉筆規箴警益尤多拜吏曹判書 靖陵

改卜監董方上已西叙知樞者數年即閑郊墅列

圖史蒔花竹闔門養靜逍遙自適或得於吟咏之

間者亦知其進退憂國之意出於自然而曠度冲

襟不以興廢有小芥滯也隆慶元年以副价進賀

京師至遼野車陷泥淖舌役皆後撻騎數十焱至

若圍住狀見府君端坐不動兩兩相視曰大人也

昇出大達然後去 明廟大行 皇帝遣使賜祭

謚府君迎慰境上及歸伴送亡何出為慶尚道觀察使時有監獄府君察其枉理出之處士之有名者陰為主張言路助之反加詆訾府君移病自免後事果白人始知之明年又出為京畿觀察使任滿迭拜工禮二曹判書 神宗皇帝即位翰林學士韓世能給事中陳三謨來頒 詔初命府君主館待盧公守慎主遠迎擯接皇華故以文事相周旋或頃刻連篇或險韻闢富當仁不讓謂之華國手二使在 中朝文望甚高盧公固辭不就於是改命交易人謂盧公之腐翰沈頓府君之擊鉢

清新兩得其所云二使一見府君即加敬待有詩
輒視稿乃出每享雖遽必成禮語譯士曰吾悅使
君風度欲常常而見之故不辭也臨別至於出涕
後見我國人必詢起居使命之來書問不絕其終
始慕用如此還 特陞一階拜右贊成又兼判義
禁言路泥之改刑曹判書已還贊成復長吏曹王
堂上劄有所指斥得 旨予觀鄭某為人其心純
實固非輕薄豎儒之比近來朝著不思協心輔國
惟其不附已者輒斥是事將欲何為時先後輩不
相得有分黨之漸府君深憂國事以詩見志已屢

改禮曹兵曹判敦寧右贊成辛巳由吏曹判書進
拜右議政諫垣論列章累上 許適 上諭之曰
右相以宏厚之器和毅之度凌雲之才每困於書
生之說豈非命也聖人猶不容世於右相何恨世
益信 君臣之際非讒毀所間而反愈於結納後
進容身保位者云明年復拜吏曹判書 皇嗣誕
生翰林黃洪憲給事中王敬民來頒 詔又 命
府君館待 詔使久聞府君名待之有加禮已還
判敦寧兼判義禁都摠管由兵曹判書復拜右議
政先是府君夢至一亭舍意甚愜後買亭一如夢

境焉仍名夢賚顏其堂曰退憂以寓晚節休退之
志明年甲申府君年七十上章致仕 不許賜之
几杖又八耆老社府君自以世臣舊家受 恩深
厚不忍決去其謝箋有云意絕立黨誰信大防之
孤忠計熟歸田欲全歐陽之晚節士林傳誦以為
於此可見公之心跡也尋陞左議政戊子秋適有
綱常獄三省會鞫府君承 命主訊連日夜不休
勞疾遽乘數請急 上遣醫診視分賜內府珍劑
絡繹道路又遣承旨問所欲言府君病徬不能對
至九月二十八日告終于城南第之正寢春秋七

十有四計 聞輟朝三日再遣近臣吊祭如儀自
舍及殮自鞠及窆有司供具二官人監護自三事
以下至于諸司小吏無不奔走來哭哭之以哀下
逮廝役里巷孺相與咨嗟歎息多有思慕涕泣
者明年二月某日葬于果川縣北冠岳山某向之
原外氏李叅奉地內從治命也府君天資寬而重
和而毅丰采峙玉風度凝遠生長法家目濡耳染
儼然夙成自就矩度人不能以聲色闕測而見者
皆以公輔期之自少佔畢數行俱下一見成誦諷
詠之聲若出金石立心行事以忠厚謹慎為本既

以忠厚謹慎致大位而其為忠厚謹慎不衰踐
銓司九典邦禮信心持正不以毀譽徇人至於國
有大禮進退左右威儀可觀廷中望之燁如神人
遇災虔禱冥應屢臻平生不事矯飾居處膳服華
而不侈儉而不陋性不飲酒而喜聲音不立門戶
而好善人接人和氣盎然人向之若春陽焉然無
敢以狎進者度量涵蓄不露圭角雖遇橫逆夷然
委順至於大事以義裁之尹元衡當國倚東朝
橫甚威福已出人莫敢忤為其偽妻之子求與為
婚峻卻不納鄭汝立陰驚暴盛衆畏其口於筵

中極詆大臣之異已者為敲撼計左右無能難

上疑問府君正言斥之其說不得售及設同宗會
宗人有欲邀汝立者府君不許後謀逞族誅人服
其明思菴朴公淳栗谷李公珥皆府君後進郎屬
而獎待無間同升諸公判書權徵尹先覺皆所尉
薦而後先至卿位有名庶弟不能家業之使足自
贍而迎庶母於家待之盡禮族人之孤窮無歸者
教養而嫁娶之恩意備至文章富麗尤長於詩動
筆如飛靡不合度宗匠一世羽翼風雅亡論騷人
楮客釋流方外之徒亭湄館肆得之以為光 九

重之內燕閑之所圖畫屏障必經府君題詠然後
為重所著述甚多遭亂散逸遺稿二卷刊行亦可
以嘗鑒知鼎也書法遒勁姿媚自成一家世多慕
效謂之林塘體君子謂人莫與衡而不以文藝自
高官位日盛而不以顯貴加人謀猷經畫資襄弘
多而不示以賢智色此庶可以名公云小子幼侍
分甘親承警咳當時稚昧觀於大君子氣象言行
未有以名言也及今昏眊國乘家牒又無可据而
據者五十年立朝事蹟若是鹵莽竊不自揆敢效
推測之知府君厚德陰功不獨生人之類蒙被其

澤雖昆虫肖翹之微未嘗枉害向之強宗大族燁
赫一時者未及百年衰替不振而府君之後累公
累卿世故百變兵燹數更而喬木不剪穰棟無易
廟享如新嗚呼豈無所自而然歟配曰原州元氏
封貞敬夫人觀察使諱繼蔡之女純德懿範克相
內治結髮至老相敬無晉每時節慶壽簪紳環珥
左羅右列愉愉婉婉以承娛樂福祿之盛世無與
兩也後府君七年癸巳十月十七日避兵在海西
以疾卒于松禾縣之村舍壽八十明年某月祔葬
府君墓右有一男五女男昌衍左議政長女適郡

守尹善元生一女次判尹柳自新生五男四女次
都正金克孝生五男即尚憲先君子次都事韓浣
生三男四女次士人李成麟生一女議政生二男
五女長廣成兵曹察判次廣敬大司憲察判三男
一女長太和觀察使次致和舍人次萬和生貧女
適司諫尹絳大憲四男三女長至和生貧次采和
次知和正言次以和女皆適士人內外曾玄孫統
若干人銘曰

文翼之孫寔我外祖祖亦有子繼踵繩武三世三
公孰與之伍曷由以致惟忠與厚積德為基高而

益固若稽古史漢有章平曰袁曰楊並美東京更
千百載塵若而家外氏克配大不為誇冠岳屹屹
漢水滔滔青烏是卜畢如其事誰其銘之外孫之
辭

清陰先生集卷之三十五

墓誌銘十首

司諫院大司諫八松尹公墓誌銘

并序

故大司諫八松尹公者坡平人剛毅有大節自少力學篤行常懷經世志數上書論事皆國家所以安危存亡之故然終於無所合以卒余嘗論天之生材若有意於用世而合者少不合者多或始進而終攘或貌悅而心忌生不能益於時死乃有名於後抑何歟不肖之徒懷奸誤國而處高位享厚祿者肩相磨獨賢者忠者常疏遠不親而反有視

之若仇怨嗚呼豈盡天意耶崇禎九年二月公遇
灾上䟽其略曰今日之天怒極矣舉國之人遑遑
汲汲而殿下深居九重羣臣無敢見者上下沓
沓莫之知懼自古安有如此而國不亡者乎夫承
弊政者不可守常道拘小節者不能成大業今日
若不大警動大作為痛革因循之習則必亡救於
亂亡之禍也臣前日請停廟樂非不知廟樂
之難撤然而必以廟樂為言者廟樂既撤則
御膳必不求甘御服必不求美內帑內需不得
不出宦官宮妾不得不減進上可罷貢獻可除

推此以往則百為浮費一切蠲省而轉危為安在
此一着也何以言之今日圖存之策只在保民與
養兵 祭享御供一倣 中朝之制罷外貢而市
買以用如太官之羹饗漁箭尚方之織造工作並
皆停罷以法土簋藜羹短褐之盛德宮嬪板房用
復故制以省收布供薪之費此外凡所以節儉省
約者皆自 聖躬始內而勲戚所占公田山澤之
利諸司大小私俸之濫一歸之度支外而各營列
郡暴歛冗費苞苴饋獻之類次第釐革則財用有
道而民得蘇息矣臣聞八道墾田五十餘萬結度

支歲賦米不下十四萬碩恒費居三之二用其仞
以代常貢必有餘裕稅外凡徭既盡除然後一結
田賦五斗米一匹布以為養兵之資食不足不患
矣又就諸道軍額簡其精銳擇其將領贍其衣食
習其技藝明其賞罰勝兵可得七八萬兵不足亦
不患矣三月又上疏曰醜虜肆然以惡逆加於我
既不售而歸若不甘言愚我必鴟張豕突懼我以
兵不及此時竭力自強一朝倉猝終未免聽其所
為則今日之抗義適足為空言實禍之歸今之急
務莫先於輕徭薄賦慰悅民心臣之前疏所陳者

是也願 殿下亟下哀痛之教使八方曉然知
殿下大有為之志然後 親御國門日討軍實而
申儆之勿復為燕安姑息之計所撓奪也八月又
上劄曰臣之前日所言陰雨之備也今則禍機已
迫燃眉之急也請 殿下先發宮掖近習之少壯
者次發宗室百官之才俊者次發儒生次發吏胥
次發市民次發公私賤則國都之中可得數萬人
四方選兵亦用此道先發豪門盛族後及小民則
孰敢怨咨孰敢規避如是則十數萬精兵不勞可
得罷備邊司而去遙制之害撤江都之備焚行宮

而進駐平壤以視必戰無退避之意則忠義之士
羸糧景從兵不徵而自集食不求而自聚軍容盛
壯風采立變孰與畏約無窮卒以禍終哉此皆人
所不敢言而公獨盡言不諱其終始懇懇之誠不
翅隳肝瀝膽而聽之邁邁訖無見行是年冬虜果
傾國入寇國家之辱生民之禍盡如公言尚不
悔悟乃有訾公先為不祥語以讖大禍者嗚呼人
也非天也公諱煌字德耀八松其號也高麗太師
莘達之後五世至文肅公瓘寔生文康公彥頤仍
父子有大名屢書國史文康後十三世至公高祖

偉父長國學成就弟子甚多蓋自太師以來殊勲
大科奕世貴顯者十有八公世數三韓名族必舉
尹氏為右曾祖先智忠清兵馬節度使祖諱暉考
諱昌世皆不仕後以公貴 贈大父左承旨父吏
曹叅判母曰貞夫人清州慶氏副提學渾之女隆
慶辛未生公弱不好弄巽巽有度及長委禽於牛
溪成先生之門飭勵不懈先生重之壬辰父憂廬
墓二十七擢文科選補承文院權知副正字久之
無居山道察訪本職如故轉成均館典籍遷司憲
府監察改刑曹佐郎又改司諫院正言無春秋館

記注官舉劾不避親故病辭還典籍歷兵禮刑三
曹佐郎壬寅左遷水原判官明年罷歸亡何叙還
禮曹陞正郎又無記注官時統營須強佐銓曹舉
公為從事陽言遶東而實遠之也亡何拜北青判
官居二年所凡利害無不興廢者戊申辭歸明年
又出為靈光郡守郡太劇難剗公至期年積案如
洗率邑子弟興于學行養老禮親奉母兄上下同
樂人大悅喜及去郡人追思碑之歷成均直講奉
常食正軍資監正丙辰公之長子連繫誣告獄坐
罷公見時事大變退歸鄉曲不跡於朝癸亥今

上即位起拜司憲府掌令時有廢世子按律之議
公持不可自免去遂得朔寧郡守適有公格不赴
拜軍器寺僉正司宰監正亡何還掌令陞執義入
玉堂為脩撰校理副應教移司諫又還應教明年
正月李适叛 上幸公州檢察使辟公從事先行
至公州仍留 行在御營使李貴往視江防望賊
旗先遁軍遂大潰貴方負功自擅 上亦倚重言
路厯厯請罪其副將公上劄力爭貴軍法人人無
不竦然聳聽然公之後來枳仕塗實由此始焉賊
平扈 駕還都移議政府檢詳為舍人司諫者俱

再秋丁母憂丙寅服闋拜司成復移司諫又移輔
德胄筵狃習漸懈公每當進講勸戒切至世子
甚敬憚是後遷改不出經幄宮寮之任輔益弘
多丁卯西虜大入邊廟堂請奔都城以避之公為
司諫極言其非計請斬倡議去邠者命世子分
朝策應議不行寇深上幸江都公從行大臣勲
貴多側目視公者而公論議益激勵不少屈虜使
劉海等來求盟上召公卿臺諫議之李貴崔鳴
吉皆言不可不從公極言和不可恃引宋汪黃事
以折之上意與鳴吉合竟用其言公退與同僚

抗論請鳴古禦寇降將弘立蘭英等導虜反噬斷
頭號令皆不省公慷慨不已復上疏曰今日之
事名為和而其實降也終有必亡之道等亡無寧
決戰請亟斬主和誤國之臣逗撓奔潰之將又斬
虜使而回賂胡之物犒賞三軍激勵人心上怒
下教尹某疏中降字究慘問啓公正言直對上
愈怒命奪職編配政院封還內旨三司交爭
上亦悟命仍其職公再辭乞適會臺諫之簿時事
者美公而惡勲柄其人前既絀未發因此欲兩中
之危言激怒上亦內不善以其名臣置之公謝

病歸鄉里亡何拜舍人適有不獲已者俛俛還朝李
仁居誅上見其檄文入毀言疑公諫疏為崇正
下嚴旨公移病自免久之以御史暗行西關窮邊
險要無不遍歷悉陳撫民固圉之道還拜司諫用
薦者除吉州牧使銓曹請例加不許命移安邊
言路爭之留備補拾拜司成太僕正屢改應教舍
人輔德執義論宮禁不嚴上命補職尋復通列
擢同副承旨序陞右副明年拜吏曹參議乞職上
塚還為大司成移兵曹參議明年力求補外得全
州府尹首以寬民力為務罷不急之役量田使者

意在增賦公不從田與賦相左者一正之州人刻
石頌德公素患目眚自南歸決意休退再以諫職
召皆不赴丙子遭王妃喪力疾就列上哀傷
踰節久不視朝公以為國事岌岌宜日接臣隣講
究治道一日引對公又申前疏土簋短褐等語承
旨李敬輿亦勸上振作冀以感動左右有以俳
諧戲侮者公即舉劾上以災異命停月膳著臣
上疏請復勲戚大帥營私蠹公公並劾之由是不
悅者滋多謗口謹譁公累章乞遫至十二月義州
告急書至不三日虜騎已到西郊上蒼黃欲幸

江都不及入南漢山城公病欲聞之與一子馳赴
大臣已下錯愕失措公言于體府請先輸近城倉
粟發輕騎急運武庫兵兇不能用先是虜使持至
偕號書上與廟堂定議斥之至是虜欲得當時
主是議者以試我於是用事之人乘時圖逞喜得
圈套平日清論之攻已者睚眦已上欲盡置其中
網絡張設無遺力乃陰喚諸營使兵士露刃宮門
以脅之又矯內旨迫令自首頗有濫及公上疏
待命又往體府奮言以身自當口號韻語與同
舍相訣親故聞者多來哭別寄書諸子處後事夷

然若它日會臺諫叩閣請申敷上可之遂以尹集
吳達濟二人為應公及諸人得脫虎口矣迨上
自虜營還都偉相悍奔仇視士類計將魚肉之覩
上意不果尋命大臣加罪同譴者十人公為首目
以語涉不祥始命遠竄言路力救止配中道公
既至配所不與外人交深居杜門仰屋長歎而已
至冬下教放釋然非德音也公不敢歸家越境
俟命明年秋始還尼山丙舍為終焉計或勸稍
近京輦且令諸子赴公車以避疑謗公曰七十之
年兩目不見復何所覲謂諸子亡以我故易志死

生禍福命也終不動及聞朝廷有助兵之舉自
此絕不問時事牢卧一室足不出戶庭五月感疾
却藥不御遺命就先兆薄葬歛用士服勿飾墓四
禮一遵平日訓書至六月三日易簀于正寢春秋
六十九病時諄諄若吟嚶旁人諦聽皆古人歎世
傷時之語其惓惓憂國之意至死尤篤忠義之性
出於天者蓋如此子舜舉等祇命是年八月某甲
窆于尼山某里某向之原公為人莊重簡默終日
不設情容及至接人溫然謙卑長者少孤事母甚
勤共養腆備推以待昆弟姊妹加於人數等長子

以公道將授官公舍子舉弟以悅親意於宗族故
人之貧窮者曲加撫卹所居州郡節省致足斥其
餘以代民役而終不視德米谷魚鹽簿書井井吏
不得容其奸以至館宇橋梁饗餼之具賓旅所待
以周者咸無廢公雅不喜赫赫聲而考績常為一
道最言未嘗極人過失至論義理之辨先定於內
奮不顧身雖人主之威亦不能奪當急遽造次之
際精魄益壯發謀出慮高於平日慷慨揮涕觀者
竦動為文根柢道理遇事論列辭直理明一時號
以文詞稱者有不如也平生所為章奏切於君德

時要者甚多顧余不能盡載然見其槩亦足以知公也嗚呼賈長沙陸忠州俱不究所蘊自古而然於公獨何憾焉必有任其責者矣公有六男三女長勛舉縣監公在殯病歿次舜舉教官以公命出後伯父商舉奉事文舉校理宣舉進士女適李正輿權僞二人天側室三男一女民舉進士耕舉生貢次時舉女為判官崔魯詹妾縣監子曰抃損教官子曰揔校理子曰搏援進士子曰拯推子姓兄弟文學行誼多有過人者人知公之後必將大顯以蕃而成公未伸之志也銘曰

我宣祖之後二十餘年當中國崇禎之世有
賢大夫大師之裔身姓尹時之不泐履否運數憤
忘身盡忠塞衆圓獨方擯以殞魯城之丘從父藏
長夜冥冥自耿光江河不廢名與長

進士許君墓誌銘并序

進士陽川許君淮字巨源永平縣令諱鑄之子江
東縣監甥之孫左贊成礪之曾孫贊成之父曰左
議政文貞公琮文章德望與兄忠貞公琮俱為
國朝名臣永平公娶於權氏別坐錯之女於吾先
子為中表君生於萬曆癸酉少余三歲既同業又

同居長安中以是與君相知為稔君顏豐而黑眼
大而有光首首類河朔大使外若難狎而中實寬
然蚤執頗有名曹偶間善談諧喜交游勝己者親
就之窮而有所急者濟之不遺力然性伉倨不屈
於人亦不能匿人過故時有訾口此余平昔所見
而聞之者也今按狀君有深愛於父母一日不忍
去其側雖有事不出百里外恒若乳哺時其父母
愛之亦異於它子永平公嘗久病君方冬沐浴禱
天鑿藥巫卜之事罔不盡心三年不少怠壬辰避
寇山中永平公為賊所逼危及之君舍生負走挺

險遂得脫伺賊稍遠即力為營求必致憚口之味
以佐七箸從子之為祖後者染瘟疫危篤人皆避
之君昇致于家救之得活平生好書不釋手聞有
賣書籍者輒捐財購買雖為布衣其多蓄書一時
文人學士家有不如也取聖賢格言揭座隅以自
警曰此喚醒良藥也至於諸流外家筭數方技之
書靡不涉獵或有不學而能之云若是則其脩於
家者又何備也自負其志欲一見於世久躋不振
年三十一始中司馬常鬱鬱不自得居恒語諸子
吾先累世公卿可謂盛矣吾不才宜瘖力嗣家聲

吾有望於汝輩也及長子登第復誡之曰禍患之
餘尤當謹慎保全姓名扶持門戶足矣非義進取
切勿營心乙卯遭權夫人喪在廬次過毀致疾就
京近豎竟卒于城南之寓第實萬曆丁巳六月二
十九日也明年戊午卜葬廣州治南初月里久來
峴卯向之原配察訪高靈朴盡性女甚有婦德生
後君二年卒後君七年祔于同塋崇禎庚辰患瘧
水移就舊墓數十步地改窆而面背用前君有六
男二女長授前任坡州牧使次櫜司僕寺僉正次
補司饗院叅奉次掄格擇長女壻李搏次女壻辛

喜增牧使娶社稷令李慶澳女生二男一女僉正
娶別坐鄭霄女生一男叅奉娶生負李順俊女生
二男掬娶監司李惺女生一男一女格娶縣監李
景崔女生一男擇娶府使李必達女生一男李搏
一男辛喜增二男内外孫搃若干人嗚呼以君之
氣聚才能有所遇而發用與夫世之乘時際會馳
騁以取功名者豈後也哉士之遇不遇有命悲夫
銘曰

有山巒巒有丘蜿蜒舍舊新圖福人之安

司憲府執義晦谷先生權公墓誌銘并序

權氏自太師幸得姓以來七八百年文學賢勞功
名不曠于史當我宣祖時有晦谷先生者實太
師之廿五世孫也其諱春蘭其字彥晦其號晦谷
其居安東其官古中丞其考贈左承旨錫忠其
王考軍器主簿贈左通禮模其妣淑夫人咸昌
金氏其生嘉靖己亥七月之二十五日其卒萬曆
丁巳八月之十六日其壽七十有九其葬師尼山
未向之原距其葬二十四年崇禎己卯之歲其從
子泰精狀其行問銘于其同郡金洵憲其狀曰先
生年二十三中司馬三十五登文科隸成均館為

學諭轉學錄薦授藝文館檢閱序陞待教奉教遷
司憲府監察出為大同察訪入拜司諫院正言改
持平病辭除直講禮曹正郎乞外得永川郡守丁
亥遭父憂廬墓盡禮服除除直講獻納病辭又出
為義城縣令明年棄歸久之除世子弼善掌令司
諫皆病辭除執義兼世子輔德謝恩即歸適為
通禮院相禮還輔德固辭不許亡何請告歸鄉
屢除直講司藝司成司諫執義兼史館編修皆病
辭辛丑赴青松府使居三月遭母憂廬墓如前喪
自是充息意世事優游林下讀書談道甚適間往

來山洞與柳西厓諸公講究疑義以弘文館修撰
校理召皆病辭除榮川郡守引年不赴以此竟其
身先生天性純潔靜正容貌白皙如水壺洞徹表
裡無雜少即有向學之意一日問承旨公曰天地
間何物為貴曰惟人曰何以貴曰為子孝為臣忠
由是而用為貴仕曰仕固不足貴若欲盡忠孝舍
學何能承旨公心異之試授孝經讀已曰讀此而
如不讀者非人也時時取周易効畫卦默玩承旨
公曰此大人學非兒所可解先生跪曰兒竊慕大
人志承旨公益奇之已就柏潭具公學晨輒造門

外待朝大寒暑不變柏潭喜曰不意今日復見立
雪之人先生益自刻勵於聖賢遺訓求必力踐不
獨資口耳為也至於科第仕宦非其所樂特為親
屈焉先生又就退溪李文純公請益退溪久聞其
名為之遜席甚重待之先生潛心墳典自六經四
子以至九流百家之書鮮所不窺而其所喜尤在
於易常書中字揭座隅朝夕顧諟尋思喜怒哀樂
未發前氣象其靜中涵養工夫多有人所不及知
者其事親周詳婉篤平居務盡承奉歿饋真必哀
慤致毀踰節見者愍然金夫人疾欲割股見愈者

月餘幼遇外王父喪哭泣素食如成人勸之肉不肯從曰父母之父母與父母奚間我兄弟四人怡愉湛樂起處與同衣履僕御不知其有常主也每朝謁家廟退坐書齋無一日不開卷如心經近思錄諸書雖臨民聽訟之時亦未嘗去案也其為守令以正民心厚風俗為先月朔行養老禮親為勸酬撫摩單赤不翅乳哺而柝席之嘗遇飢歲設倉振救多所全活及秋將收糴悉焚券曰若有公譴吾當任之自大同歸不以西州一絲自近並卻道路費其去義城到中途親閱行李見有紫草一囊

責謂家人顧此雖微亦係官中物豈容溷吾橐立
反之永川俗好鬼崇奉淫祠否則必有風災疾疫
前為守者不能禁或為其所動反助其事積歲年
亡敢廢之先生至下禁令曰鬼能死人吾亦能死
人違吾令者不汝貸是後其恠帖然遂絕鄭寒岡
治安東訪先生嘗從容先是官舍有花名女妓者
寒岡命剪去先生問其意曰人之易惑者莫如色
故惡其名而去之耳先生曰苟吾心有主南威西
子尚不能移何畏乎假其名者乎明府之政抑末
也歟寒岡深服其言蓋先生久客關西黎渦百媚

終不能回先生一眄云在胄筵僅數月極盡誠意
不止應文備數世子亟稱其益一時雖若忘先生
者然每當朝議相軋紛然爭進之際不得不思先
生必擬諸顯望以風奔競之徒 宣廟謂近臣曰
權某不樂仕豈以予不足與有為耶常為慨然其
難進易退之節人生有不能奪者如此先生雖家
居聞 朝廷行一善政喜形於色聞善人去不善
人用則為之憂歎累日以是知先生不果於忘世
也待師友無間終始柏潭病置官事奔救至棺斂
葬送無少憾後與諸生考核遺文定為完藁以期

不朽人謂子雲不死侯芭在也一鄉議建書院于
龍山以祠柏潭先生實倡之金芝山八元居後母
喪殆先生開以禮意芝山不從有善言歸語人人
俾彰其善襟懷清曠酷愛山水於山半讀書處增
飾小堂顏曰鑑源別巖洞開陂塘蒔花種木宴處
其間樂而忘食其視世上紛華名利之習若浮雲
然其接於物也虛心巽志不設防畛燕語談笑不
自示異論人善善長而惡惡短至辨義理擇是非
一刀兩段聞先生之風者無不願識其面及其見
之無不起敬既退又無不洒然易慮道使者州縣

守長修刺詣廬下旄溢巷一成賓主禮而已無城
府跡引誘後生勉進為學嘗夜坐聞鳥聲綿蠻不
息顧諸姪曰彼微物猶知率其性人而不學豈不
媿於彼乎始先生學於柏潭前輩多見期以異日
斯文之重至其晚歲而驗之日用心身之間純如
也臨絕屏婦女戒家人斥巫卜祈禳之術易衣整
容取筆書歲在龍蛇昔人興嗟乘化歸盡不復有
恨治命毋入堪輿家言從先人葬所著進學圖孔
門言仁錄藏于家嗚呼先生可謂學問中得力人
也先生娶府使朴承佩女無子所養弟之子叅判

泰一尸其祀側室女一人為李夢得妻生四男一女天啓辛酉多士合謀以先生配食于柏潭即所謂龍山書院者也欲知先生之德者盍於是乎考焉銘曰

鑑源之亭師尼之岡山若增高水若增清云誰之宅其人如三

贈吏曹判書金公墓誌銘 并序

大司寇金公既追封其三代狀其先人之行屬余塋銘曰先人之友盡亡獨吾文在不及今圖是先人之德終堙沒於地中惟文人哀愍其歿與存惠

之一言吾父子受賜多矣余不敢辭謹摭狀所載
家世行實壽年月日及嘗所覩聞者叙而銘之公
諱興字善慶軍資判官 贈吏曹叅判諱渠之
子 贈左承旨諱德秀之孫大司成 贈吏曹叅
判諱湜之曾孫本新羅苗裔徙籍清風世為名族
大成公與靜菴趙先生為道義交己卯之禍憤群
小蔽明自經以見其志士林痛惜之至今承旨公
家難不仕久之事大雪錄被枉諸賢後叅判公始
官尚憲先君子與之契厚亟稱其操履雅正配密
陽朴氏佐郎諱之女生公於嘉靖甲子家世受儒

蚤游栗谷牛溪二先生之門疑疑有立弱冠才業
蔚然於文辭華翰無所不能尚憲宗兄議政公及
檜原黃思叔完山李實之相與為脩辭公並游其
間兄視議政公而弟蓄余乙酉中司馬兩試一時
士友慕稱之以為一第不足道公氣清而厚質才
敏而遜志內行甚備尤以善喪聞初密判公卒官
江東公隨喪歸行山谷六七百里遇險必手自扶
攬以過攀號殞絕行路感動廬于墓側日必周省
塋域哭必盡哀朝夕祭品自織微以往未有不由
其身者壬辰避寇關東轉向海西喪除已毀遭難

流離菽水不給聞牛溪先生寓居石潭猶自力往來問學先生嘉其志而憇其病數以藥物米粟濟其急拜 康陵密奉不赴病漸欲至甲午四月十六日遂卒得年三十有一臨終顧謂長子曰爾若自奮成吾家吾死無憾後果服訓厲志首居大科歷敷中外以至今官 恩及泉壤可謂有子矣公委禽於縣監趙希孟之門靜菴先生從孫女生二男二女後公七年庚子歿始公葬海西至是返窆揚州金村里先兆內向坤之原與夫人合墳長男堉雅負士望今為刑曹判書請銘者也次曰堉龍

安縣監女適士人李命傳李天培判書娶進士尹
汲女生子二人女四人曰佐明正字曰佑明進士
女皆嫁簪纓家士人金崇文密奉黃道明正郎徐
元履士人尹鉉其壻也龍安娶縣令韓汝瀚女生
一子曰就明一女幼李命傳一男二女李天培四
男一女內外孫曾搃四十人繼自今殆未可量也
嗚呼士之懷材抱器不售以歿於世者必於其後
哉之今於公益可見也銘曰

才則成兮行則徵志何未就兮壽何不羸蓄之厚
兮洩之廣孰云其屯兮吾必謂之亨先人之從兮

婦以祔既順且安兮永世无傾

敦寧府都正知製教閔公墓誌銘并序

吾黨之士彬彬多文學之選一時盛言之其一驪
興閔公願吉名有慶願吉字號楓墩考諱溶成均
生負祖諱起文黃海道觀察使直節清論屢憎奸
回卒乃完名曾祖諱惲承政院右副承旨妣李氏
宗室永川君眉壽之女公幼而父母亡鞠於外氏
鋒穎邁倫年十五學于外舅李公濟臣才業日進
籍甚公車聲二十五中司馬兩試三十擢庭試
榜眼選補承文院權知正字即薦為藝文館檢閱

移世子侍講院說書已還待教陞奉教明年遷刑
曹佐郎異論者甚之擯為平安道兵馬評事連除
魚川驛丞歲鏡黃海幕佐佃隍關塞者數年辛丑
拜工曹正郎歷司諫院正言獻納弘文館修撰校
理司憲府持平或再至或三至焉常帶三字銜壬
寅仁弘之徒文景虎受嗾疏詆牛溪成文簡公倖
相從中煽備火色甚盛公秉憲偕其長黃公慎力
辨其誣坐貶全州判官亡何論竄鳳山六年遇赦
西叙尋拜開城府經歷久之復入為修撰校理獻
納歷掌令弼善直講司藝司成內資內膳司僕禮

賓諸寺正皆未久遷拜承文院判校考滿陞秩緋
玉拜僉知中樞府事移敦寧府都正崇禎壬申正
月十四日以疾卒于京城第去其生嘉靖乙丑六
十有八年用是年三月九日葬于驪州新津里卯
向之原生二男三女男曰聖清先公歿次聖任察
訪女長適叅判鄭廣敬次持平韓正國次承旨金
南重聖清子一曰忠亮女一適李東奭鄭廣敬子
三曰至和叅奉采和知和舍人女三長適縣監李
起先次進士洪柱世次韓保韓正國子二曰後契
後奭金南重女二長適洗馬羅星斗次徐正履內

外曾玄孫若干人公天性真率自少與人交不設
城府洞見底裡座客恒滿喜調諧好博奕窮日夜
不厭及居臺省持論侃侃癸丑廢母議起奸黨
有長玉堂者恃奧力雛視諸寮公以孤蹤側其間
終始不撓一二同志賴以強其議遂寢聞者喜謂
不意韓休乃能如是云平生痛不及養祭必慙創
永川之喪持服以報從兄諸子孤窮無歸鞠養於
家教誨成就今刑曹判書聖徽其元著者也最惡
脂韋骯髒之態晚際不能俯仰於新貴間踽踽無
懼挫抑以終世共惜之東陽申君翊聖狀公遺事

以其孤之請屬余誌壙余於公好兄弟即已心許而患難靡暇遽已十年所矣東陽已逝余迫八十愴懷今昔垂涕而為之銘銘曰
出乎驪反乎本首丘願彼以寧此以晏利嗣胤一時之短後世之長名永彰玄石如璧厚夜如晨銘之者故人

堂兄刑曹叅判休菴先生墓誌銘

并序

堂兄休庵先生諱尚寓字汝秀自號休菴安東人我金氏胄於高麗太師諱宣平由太師以來四百餘年蟬聯襲慶入本朝自中顯大夫判典農正

諱得雨三世而至高王父司憲府掌令諱永銖曾
王父平壤府庶尹 贈吏曹判書諱璫王父信川
郡守 贈議政府左贊成諱生海贊成府君有三
子仲諱元孝軍器寺正後以子貴 贈吏曹判書
聘完山李承說女 恭定大王子謹寧君之後嘉
靖辛酉五月十一日生先生幼服庭訓孜孜進學
及長游黌宮所試輒屈其曹偶斐然有聲弱冠舉
發解第二名栗谷李文成公主試亟稱其才由是
名益著中壬午司馬乙酉居母憂以善喪聞喪除
益自刻苦讀書恒至丙夜不倦群從弟從而肄業

者睡間稔聞先生伊吾聲亦能闡誦若素習者然
年三十登文科別試選補承文院權知正字壬辰
故相沈公守慶建義湖西討倭寇聞于朝以先生
為從事諮議幕畫甚重之明年赴行在薦授承
政院注書移拜藝文館檢閱時賊據瀕海郡邑朝
夕再逞朝廷將復請天兵遴遣使价事機危
急人多憚行上引見問疇可往者諸臣未有先
應者上意頗不豫先生方珥筆記注使事非其
任廼自請願充下价上即許之褒予甚至竟以
史官不備不果行然上固意屬之明年陞奉教

轉兵曹佐郎移禮曹又明年還兵曹每銓注一批
下未嘗越先生而用他人也亡何置三路巡按御
史選用邇列剛直人先生得江原道至界廉得紀
法吏按覈請治犯法吏者用事大臣所昵比也反
喉言路劾之上察其狀罪犯法吏而直先生已
靈光缺守巖邑近賊籍言需材越格授先生實擢
之也先生不少見幾微悉心營職三年而政成豪
彊屏息吏不敢欺積案若洗魚鹽米粟充溢不可
勝用課績為一道最丁酉倭犯湖南易武弁見代
方伯辟致幕下接伴使張雲翼請為從事隨天

將麻提督往嶺南島山之役常在軍中明年屢除
軍資內贍二正成均司藝以湖南調度使餽天
朝水兵還朝出為公州牧使州廼湖甸襟喉兵荒
戶口散亡幾不為州適修山城臬司開營征輸保
障左右交責前數守俱以能選而至輒敗去先生
至凡衽席而乳哺之者靡不曲盡惠愛周洽數年
之後流逋盡歸百弊修舉卒以告完體臣道臣臺
使者相繼上治績特命增秩賜書褒義蓋比之
古循良云壬寅以病棄歸大臣薦為四道調度使
出入湖嶺歷險阻數千里簿書期會動合便宜致

粟累萬石軍食裕而民無病焉三歲事竣亡何有
海州之命宣廟駐蹕之地必欲選良牧以惠
其民銓曹所擬不當上意三易而至先生先生
勞役于外且十年知舊爭勸自免先生慨然曰既
出身事主夷險皆吾分也黽勉赴官明年病辭先
是州田政不綱吏假手上下豪右詭免小民偏困
先生按籍而加整齊焉徭賦始有絜法蓋久而人
人稱便秋拜竹州府使亡何坐事罷戊申拜同副
承旨序陞左副朝京賀千秋節還右承旨詔
使頒冊命先生為禮房善於職用陟嘉善階擢都

承旨辭遞拜同知中樞兼副揔管明年又進嘉義
大夫刑曹參判又兼同知春秋義禁府事壬子遭
外艱過毀善病會誣告獄起先生被逮方困篤不
訾省及置對不能無少失語詭傳者摘成謗言先
生墨墨不自雪也服除杜門不與外事不與人往
來唯作詩以見志知先生者咸稱其善補過奸臣
盜秉驅脅百寮請廢母后先生不詰光海問金
某曷為不參或以禍福恐却先生不聽又命庭議
可廢不可廢病者在家獻議先生終不與後詔
使至銓曹以先生克迎慰使光海怒曰不庭造者

可使儻乎廢棄不錄者十有一年今上初言者
追咎已事坐謫吉州五年量移湖西癸酉大赦自
便乙亥蒙恩入都至八月二十九日卒于家壽
七十有五夫人李氏亦璿源貴族縣監天祐女
年五十七歿葬先舅姑塋次酉向之原至是年十
一月二十日合窆于夫人之封先生內行修飭事
判書公無違志以母夫人不逮養終身哀痛庶母
難事曲意承奉終得其心居官斤斤故常不喜矜
飾至論一切利害便否奮然自伸雖嚴上官不能
棄其理自少儉約至顯無大易食無蕪味衣服車

馬僅備性嗜書手不釋卷晚喜通鑑綱目手鈔二十卷目曰綱鑑要略見者歎其精要在吉州足不出門有問業者引以善誘戶屢怙滿稍彬彬向學後聞先生喪皆致千里賻先生負用世之具思欲以所長自見既數更煩難人亦知其才且練事堪重寄而先生素不依形勢之塗故身名在通塞間不幸遇灾殆而不振卒困謗議輒軻以沒豈命也哉夫人篤於孝順仁於宗族女工婦事不懈以敏使先生自安於貧約之時以遂其業者夫人助也生二男一女長光燁戶曹參判次光煒振威縣令

女適觀察使尹履之叅判一女適佐郎李穰縣令
四男三女男壽翼義州府尹次壽斗壽一壽必壽
一出後叅判女適宗室豐萊君灤一天一未字觀
察八男一女曰坦郡守垺縣監埴天垺縣監埴監
察埴縣令城進上埴幼學女適府尹宋時吉側室
男三人光焜光煉一天内外曾玄揔若干人嗚呼
先生之天定矣銘曰

二尊居前芳兩祖宅后裔妹坎男芳于左于右拊
以碩媛芳亡有不厚子姓蕃榮芳享祀悠久山川
發祥芳神物呵護鬱鬱佳城芳永安且固孰為之

銘号從弟叔度

淑人豐壤趙氏墓誌銘

并序

淑人豐壤趙氏戶曹佐郎 贈叅判諱守倫之女
司宰監僉正李君厚載之妻鳳山郡守 贈判書
完山君諱郁之婦忠勲府都事迴之母也大父舍
人廷機曾大父典翰宗慶俱以文行直道有名于
時外祖縣監善復左贊成鄭公大年之子門第世
所稱甲乙者也叅判公嗣守家訓以身為教閨壺
之內舉可法式淑人自幼婉孌事父母無違則及
歸李氏以事父母者事舅姑判書公性嚴難稱意

顧獨賢淑人姑黃夫人亦愛而善之委家而聽之
淑人夙夜劬心身任其勞上承下御罔不順適自
治甘毳滫瀡米鹽繁瑣以至井臼厨竈秩然可觀
於是黃夫人益喜而稱於人曰使我忘閨東之憂
者吾婦也光海五年誣告獄起叅判公亦被枉害
淑人哀號怨痛心不圖存水漿不入口者七日舅
姑強勸始一粥泣血三年衿袖浥爛叅判公既塲
鄭夫人娶居日削無所依歸淑人涕泣不食見者
感動判書公愍其志許令迎致旁舍贍養無憾後
連遭三喪居瘠若一人益稱之判書公嘗淹病淑

人晝夜襲服而侍湯藥蓋踰年而如一日父母舅
姑之遺札書必箴而藏去時時閱視悲不能止每
遇祭祀前期齋飭當祭之夕坐以待事至老不懈
僉正君有二弟淑人遇之不失其禮而撫恤如同
氣有疾病輒捐貲曲致醫藥以濟其費妯娌之間
周旋調護雖有不逮不使舅姑知之皆悅而歸心
友愛其昆弟如己昆弟之子如己子其貪者業之
俾遂生理親戚仰其仁里閑服其義凡有死喪急
難望其賙救者必曰淑人淑人若呼父母而取困
廩焉僉正君欲款客傾度閣以侑之欲施予應之

無難意人人歸君厚德長者雖其天性固然而亦
淑人能有以佐之也少習女訓小學諸書口授其
子亦以授諸孫雖甚憐愛而義方斬然嘗曰好善
惡惡易愛而知其短憎而知其善難其見識明達
類此平生狂敬自矩無私之言無一不可聞於外
者女工婦事無不逼人安於儉素不尚世俗奇褻
之製口不談財賄聞有嗜利忘義者恥若浼已尤
辨於辭受雖菜果微物非義不納接人溫而有禮
至巫師異端之流亡敢跡其闖者古所謂士女者
豈是也哉乙酉六月九日在京城壽進坊第以疾

終得年六十五宗族姻親閭里之家聞之無不奔走來哭哭之以哀用是年七月十九日葬于廣州光孝山李氏家塋亥坐之原舉二男子長即迺李殤迺中司馬以陰補官凡再娶前娶坡平尹氏後娶慶州李氏與完山之李非一姓也生六男三女曰重輝永輝益輝時輝餘並幼皆尹出重輝一男一女銘曰

古筦維形良吏是采幽操迺顯永有年載淑人之德於古有光我筆亡愧厚夜孔賜

贈議政府左贊成申公墓誌銘并序

贈議政府左贊成申公年八十以萬曆丙辰八月
二十日卒葬于畿內果川縣青谿山下叩向之原
貞敬夫人順天金氏祔至崇禎丙戌公之胤叅議
敏一類公之行亟請於余曰先人歿三十年墓石
不刻蓋有待也願得子之一言以為地下重余於
君篤世好不敢以老病辭謹按公諱黯字直孺平
山人高麗太師崇謙之後太師以元功大節未完
厥施發于後裔賢聲令望世有其人曾祖諱永錫
司憲府監察祖諱援杜稷署令考諱廷美有文行
蚤卒與兄遵美俱著名已卯間妣完山李氏宗室

鶴城君連丁之女嘉靖丁酉四月生公未晬而孤
自幼穎敏自勸讀書遂中庚午司馬屹屹不止執
業精進俛得大科雖未獲伸人頗稱之年三十七
選為義禁府都事未幾罷為典設司別提用薦兼
仕軍籍都監改典艦司丁丑遭內艱服除除尚衣
院別坐歷司僕寺主簿掌隸院司評出為奉化縣
監居四年罷歸久之拜文義縣令二年罷歸壬辰
寇亂乘輿播越公棄妻子赴都元帥金命元軍
中元帥才公俾主軍餉行朝授軍資判官亡何
師潰又赴京畿巡察使權徵幕下遷戶書正郎陞

中樞府經歷管餉如故 天子大發兵征倭饑荒之餘所在糧匱公悉心殫力隨調毋乏甲午朝議建設屯田於南陽牧地補軍食以公為監牧官兼掌其事亡何罷去有亡賴子李蕩者素有東陵之暴乘亂導賊公行殺掠吏不能禁公以計捕斬酬功堂上喈言路修甃枳之授信川郡守適為司憲府監察改翊衛司翊衛出為金浦縣令明年以年限適為漢城府庶尹會設宣武等三功臣都監公為郎廳原從之徒紛然僥冒公言其長一切裁抑卒用無濫事完還庶尹自後三四年為司宰監僉

正中樞都摠兩府經歷公倦於卯酉辭祿自佚丙辰壽滿八十用舊典進秩折衝將軍龍驤衛副護軍至秋示憊告終于京城第正寢以前有三功臣從勲起

贈左贊成崇祿大夫子姓環侍醫

蓋

缺附身附棺罔不誠慎卜得吉壤祔以厥嬪且儀備物歸安窀穸於乎社哉公天資慈良外弱而內有守前後治民斷訟問是非曲直如何不肯有所徇坐是屢遭謗傷終不改喪亂軍興之際忘私急公滌掌奉職皎然無玷吏胥自戢不敢用其術為奸利也又能精思善揣先事措處雖遇倉猝急遽

它人盡失其度公則晏然若無事自少羸病省慾寡營晚更康豫竟享遐褻與同社諸公婆娑燕喜烏皮鳩飾往來有煒一時艷言稱為九老會疾革神氣不亂命筆書遺囑甚詳脩然而逝夫人節度使特贈兵曹判書墀之女蚤喪母至誠事父判書公在貶所遘厲斲指燒灰以送聞求早柿不及嘗至老不忍食早柿為婦為母咸有法式宗族取為閨範年七十丁未六月先公歿生三男二女長恭一武科都摠經歷先歿次寬一生負金泉察訪季敏一文科承旨今為工曹叅議忠樸誠直有名

於時長女壻金吾郎權韞次女壻社稷令韓祉經
歷無子一女適柳斗瞻察訪三男一女曰愼忙愧
愧後經歷女適叅奉安廷炫叅議八男六女曰恂
文科掌令曰憬愼懽懷餘幼女長適曹翼次李冕
次李愼縣監次趙一豪次金塔金吾二男二女僕
僮女南侑愼英倬令无后恂二男長命圭進士一
幼内外曾玄孫恂百數十人銘曰
受祉于先以詒厥后吉無不利剛方之操澡雪之
箴允哉良吏壽考令終歸于吉壤永世無圯

淑夫人草溪鄭氏墓誌銘并序

故清州牧使 贈左承旨金君有賢配曰淑夫人

鄭氏醴泉郡守默之女右贊成八溪君宗榮之孫也熙朝數百年簪紳之徒官榮祿厚入而無出尚論者歎焉八溪公獨抗章致仕歸老其鄉一時聳觀至比漢二疏云夫人生長法門性識明敏自幼習女訓諸書通大意動遵軌則非禮不言既歸金氏婦道甚修舅姑重之每稱於人必曰賢婦賢婦萬曆壬寅承旨女弟入位 中壺是為 仁穆王后尊 國舅封延興府院君門戶益大事多豐豫而夫人恒存謙約務循初服人無不賢之者及

永昌大君之生親戚畢賀夫人與承旨君獨憂之
曰安知不為非福也 宣祖棄國奸臣李爾瞻等
從史謂永昌為禍根囚海島殺之幽 大妃于西
內延興公與承旨二弟皆冤死獨留姑盧氏鎖于
空宅而絕其飲食踰年遷耽羅而拊棘之夫人哀
號怨痛夜則焚香禱天顙雪至冤卧不設寢寒不
襲衣蓬首垢面乳泣血者蓋十年一日也初承
旨君薨葬他山逮禍機日深慮及泉壤宣言易槥
歸葬故壟密備棺斂諸須潛瘞隱處其計極閔人
無知者又聞奸黨謀欲戮族長男才輒忽云遘疾

不救發哀送喪親戚隣里無不驚慘遂使羸服潛
行託跡山門以避其危盧夫人久在牢閉中爨火
不舉夫人賂守者百方施計俾免絕炊及移耽羅
厚給僕人之有義者往來不絕毋乏膳服卒賴以
全癸亥 反正 毋儀重尊誅流奸兇滌滌誣冤
於是首復廸興官爵 賜謚懿愍以安車迎盧夫
人於耽羅承旨君亦 贈今官夫人與受 誥命
遺孤等歸侍膝下備極奉養人益信天道神明而
夫人至誠亦庶幾感動云乙亥隨往長子天錫鴻
山縣衙三年盧夫人歿夫人喪食者積十餘年及

姑氏淹病在湯藥間已瘁居感過毀至庚辰正月五日終于原州安昌里丙舍壽六十六越二月九日葬于舍後丙向之原懿愍公墓左而奉移承旨柩合墳焉寔 恩賜塚地也夫人平居無故不出戶閼事當意不當意不輕喜愠御家衆有法不煩而整子女祇訓閨闈之間秩然可觀忌巫祝機祥之事不容攀謁歷佐五治肅清無染承旨君惠人之困恒得好施聲以夫人能順其義也生二男三女男長天錫縣監次君錫察訪女長適正郎金光燦次適縣監崔克良次適士人李後淵天錫前娶

執義李馨遠女生二子俱殤後娶尹埴女生二男
三女皆幼君錫娶府使沈澤女生四男一女男幼
女適李周岳金光燦三男五女男壽增壽興俱向
學壽恒進士女適李挺岳次適洪柱天進士次適
李重輝崔克良三男三女男應夢應望應昌女長
適徐坦履次適李元麟餘幼李後淵蚤死無子子
其兄子挺岳即光燦胥也內外曾孫男女若干人
意必有復其始者天將以是鳴報耶余之子夫人
甥素聞閭閻之懿蓋義不可勝書今因夫人弟監
役基磅狀略序其最非溢言也承旨諱球懿懿諱

涕男延安人鄭氏出草溪高麗光儒侯倍傑之後
銘曰

坎之坎坎兮窅以黑翔陽麗霄兮幽蔀晰泰運回
環兮理則正夫人之天久乃定有來自今兮慶之
永

黃海道觀察使南郭朴公墓誌銘

并序

嗚呼此有南郭先生之墓南郭者誰朴公說之自
號也諱東說其先胄於新羅國祖後世子孫散居
居羅州之潘川者最著高麗時有直提學尚袞
本朝有左議政嘗直道宏業史不絕書曾祖曰堯

年吏曹正郎

贈左贊成祖曰紹司諫

贈領議

政嘗言金安老奸不可復用被擠遜于嶺南以卒
考諱應福大司憲 贈潘川府院君妣林氏善山
望族別坐九齡女以嘉靖甲子生公自幼異凡兒
稍長才思日進與李廷龜禹弘績齊名又與之齊
年一時稱三才子乙酉中司馬居太學士友益附
不能闕其涯際咸曰國器甲午擢 庭試狀元所
製表辭人人傳誦稱為近世無兩由成均館典籍
司諫院正言兵曹佐郎 中殿移駐海州分司扈
衛還拜禮曹正郎以接伴使從事往嶺南還又以

御史巡按北道又出為寧邊判官前在薇垣群狂
醜正公首破其肝膽坐與時輩忤數年之中暖席
不暇公無幾微色諸所以塞其職者無不盡心焉
戊戌丁外艱服除拜侍講院司書弘文館修撰校
理文學司憲府持平吏曹佐郎正郎以遠接使從
事官往義州歷檢詳舍人司成皆未久遷其在銓
席長官稱其能守古風相禮通禮陞通政出為黃
州牧使有異政拜表裡之賜介滿入拜同副承
旨陞右副日本首家康求再通信縛兩卒故重其
罪名指為壬辰犯陵賊以誑我公上䟽言賊變詐

不可許偉相當國欲自功掇至京卒無事實人服
公先見出為黃海道觀察使還拜刑曹叅議戊申
為養求補忠州牧使其冬丁內艱服除拜大司成
會諸生憤鄭仁弘誣毀儒先削其名儒籍中光海
怒欲罪首倡者遂致捲堂而去公享寮屬搢陳不
可報聞適為禮曹叅議公不樂在朝乞外出牧羅
州數年一境大治初人謂公本起文學政事非所
長而屢典大州府游习恢恢百為修舉民風土習
穆然改觀雖古稱循良無以遠過於是益信公用
世之具周而識者以廊廟之器屈於州郡歸譏於

時癸丑奸臣爾瞻等謀廢 母后起大獄 先朝

耆舊名臣無得免者公與弟錦溪公連逮下理猝

中風昇出坐廢者十年至天啓壬戌七月易簣于

揚州之村舍享年五十九士大夫識與不識莫不

相吊字公謂曰何止是耶始喪家無餘貲親友致

襚然後迺殮用是年九月卜塋于家南已坐之原

去先塋 里而近以公有扈 聖從勲 贈嘉善

大夫吏曹叅判夫人申氏高靈大姓同知中樞府


事機之女婦德純備內外並美封貞夫人舉三男


二女男長濠郡守次潢叅判今為金州府尹次溥

縣監長女壻尹順之大司成次女壻李行遠右議
政郡守男女幾叅判男幾縣監男女幾內外孫摠
若干人文貞申公欽叙公之碑曰洪春之器渾成
之德登之不清撓之不濁孝友根於天稟而不假
修為敦睦出於自然而人莫能及非溢言也余見
公解官歸家徒四壁人不以皎皎稱得句驚人對
朋友不聞誦已作先事設譬後若著龜不示人賢
智色公一何長者如是哉府尹諸君亟請於余曰
先人壻石未銘蓋有待也余於公兄弟父子之間
知之最深老病垂死不辭而為之筆辭曰

清陰先生集卷之三
而材之繁繁方而量之汪汪方而世道之連蹇方
天既與之全方人不用其半公之德有遺積方後
之人始必復揚州之東金村之墟方是為公之寃
寃玄翁銘其顯方我銘其幽公名不朽方壽金石

清陰先生集卷之三十五





卷之四

卷之四

卷之四

廿

Asami 39.66

v. 12 of 14

清陰先生集

十二

front

spine to right

OCLC

701724705

z0058



chongumsonsaengc128800

z0058

Ch'ongum Sonaeng chip

12

C. V. Starr East Asian Library, Univers
California, Berkeley

C. V. Starr East Asian Library, Univers
California, Berkeley



chongumsonsaengc128800

Tuesday, April 19, 2011 11:58:15